

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 9
Mayo 7, 2006
www.philippinerevolution.org

Editorial

Tusong sabwatang pulitikal ng Korte Suprema at Malakanyang

Habang may mga bahagyang mapakikinabangan pa rin ang demokratikong kilusan at mamamayan sa sunud-sunod na mga desisyon ng Korte Suprema tungkol sa patakaran *calibrated preemptive response* (CPR), Executive Order 464 (EO 464) at Presidential Proclamation 1017 (PP 1017), tusong mga pampulitikang layunin ang nasa likod ng mga ito. Pinagmumukha lamang itong makademokratiko, pero pinadudulas ng mga ito ang daan para sa pangmatagalang layunin ni Gloria Arroyo na kumapit sa poder at supilin ang mga paglaban sa kanyang paghahari.

Layunin ng dalawahang-mukhang mga desisyon na palusutin si Arroyo sa anumang pananagutan o kaso ng paglabag sa sariling konstitusyon.

Dahil sa napakarami at napakagarapal na mga kaso ng pang-aabuso na nagbunga ng matindi at malawak na pagbatikos sa mga pasistang pang-aabuso at sa mga paglapastangan sa mga karapatang sibil, hindi maitanggi ng Korte Suprema na tadtad ng mga paglabag sa konstitusyon ang mga patakaran at kautusang ginamit ng Malakanyang para pigilin ang paglalantad ng katotohanan at ang panunupil sa mga demokratikong pwersa, oposisyon at mamamayan. Naobligang bigyang pansin ng Korte Suprema ang mga ito at langkapan ng pakitang-taong pagbatikos ang naturang mga patakaran. Sa proseso, iniwasan na magmukhang tahasang maka-Arroyo at masira ang kredibilidad ng korte.

Nagbulag-bulagan ang Korte Suprema sa esensya

ng mga naturang patakaran at hakbangin ni Gloria Arroyo upang pilit na

palabasing ang mga iyon ay pawang nasasaklaw ng kanyang kapangyarihan. Itinaguyod ng pinakamataas na reaksyunaryong korte ang mga esensyal na nilalaman ng mga pasistang patakaran at batas na ginagamit ni Arroyo sa pagsikil sa katotohanan at panunupil sa mamamayan. Hindi binigyang-pansin ang ugat nitong pang-aabuso sa kapangyarihan ng presidente. Sa halip, ang pinuna lamang ay ang mga pang-aabuso ng mga nagpatupad at pinayuhan pa si Arroyo kung papaanong mas madulas na magagamit ang kapangyarihan ng estado sa pagsupil sa katotohanan at paglaban ng mamamayan.



**Mga tampok sa
isyung ito...**

**Matatagumpay na
opensiba ng BHB**

PAHINA 3

**Buuin ang mga Yunit
Pananggol sa Baryo**

PAHINA 4

Insulto sa Mayo Uno

PAHINA 10

Iginiit ng Korte Suprema na "karapatan" ni Arroyo ang pagdeklara ng *"state of national emergency."* Hindi nito kinastigo si Arroyo sa pag-angkin niya ng mga kapangyarihang batas militar kahit hindi tahasang nagdedeklara ng batas militar. Katunayan, itinaguyod nito ang karapatan ni Arroyo na gumawa ng kaukulang mga mapanupil na hakbangin—kabilang ang paggamit sa militar at pulis—upang "sawatain ang rebelyon." Naninindigan man itong ilegal ang pag-aaresto nang walang mandamyento, tahimik ito sa ilegal na pag-aaresto kay Cong. Crispin Beltran ng Anakpawis at sa kautusan para arestuhin ang lima pang progresibong kinatawan sa Kongreso at iba pang personaheng kumakalaban kay Arroyo.

Itinaguyod ng Korte Suprema ang "pribilehiyong ehekutibo" ni Arroyo bilang presidente na nagbibigay sa kanya ng karapatang itangging iharap sa mga pampublikong pagdinig at pagsisiyasat ang mga upisyal ng gubyrno, militar at pulisya. Kabilang sa impormasyong maaaring ipagkait ng presidente ang mga pag-uusap at sulatan sa pagitan ng presidente at ng

matataas na upisyal ng gubyrno, gayundin ang mga napag-usapan sa mga pulong ng gabinete na sarado sa publiko.

Ayon sa Korte Suprema, "karapatan" ng estado na supilin ang mga demonstrasyon sa lansangan na "walang permiso." Itinuro nito kay Arroyo na gamitin ang Batas Pambansa 880, na binuo sa panahon ng pasistang diktadurang Marcos, bilang instrumento sa pagsupil sa mga rali at pagbabawal na magtipon ang mamamayan sa Mendiolá, EDSA, US Embassy o saan mang lugar na gustong ipagbawal ng Malakanyang, ng mga meyor at ng pulisya. Pero nananatiling tuso at ayon sa sariling interpretasyon ng Malakanyang ang "pagsunod" nito sa mga payo ng pinakamataas na reaksyunaryong korte. Kaya "alin-sunod sa konstitusyon," patuloy ang panunupil at paninikil-ang pagpigil sa mga demonstrasyon, pananakot sa masmidya, pang-aaresto at pagtanggong humarap sa mga imbestigasyon sa Senado at Kongreso.

Gayunpaman, wasto ring ituring na bahagyang tagumpay ang mga desisyon ng Korte Suprema, pangunahin na yaong pumupuna sa

mga pang-aaresto nang walang mandamyento, pagkontrol sa masmidya at lahatang pagbabawal sa mga upisyal ng gubyrno na humarap sa mga pampublikong pagdinig. Nagagamit ito ngayon upang igiit ang pagpapalaya ng mga ilegal na inaresto, ang mga karapatan ng mamamayan na magpahayag at magrali, ang pag-iimbestiga at pagpapanagot sa mga upisyal ng Malakanyang at ng AFP at PNP sa mga kinasasangkutan nilang mga katiwalian, krimen at pagtatakip para sa rehimen.

Marapat lamang na gamitin ng mga demokratikong pwersa at mamayang Pilipino ang mga desisyong iyon bilang tuntungan ng paggigiit ng kanilang mga demokratikong karapatan. Kailangan ding puspusang ilantad at uboskayang labanan ang mas esensyal na patraydor na mga adyenda at pakana sa likod ng mga ito, tulad ng pagbibigay-basbas sa patuloy na pagsusupil sa mga rali sa pamamagitan ng BP 880.

Nagbibigay-silip din ang mga tusong desisyong iyon ng korte kung papaano ilulusot ni Arroyo sa mga ligal na butas ng karayom ang pinakainaasam-asam niyang pagbabago sa konstitusyon. Dapat matyagan at labanan ang magiging papel ng Korte Suprema sa mga maniobrang ligal ng rehimeng Arroyo upang ibwelo ang niraratsadang "chacha." Ang nagaganap na kutsabahan sa pagitan ng Malakanyang at Korte Suprema—na mayorya'y hinirang ni Arroyo-ay tiyak na ibayo pang magiging malinaw pagharap sa usapin ng *charter change* o "chacha." Nakasalang ngayon sa Korte Suprema ang kaso laban sa "*people's initiative*," ang pagpapapirmang isinasagawa ng "Sigaw ng Bayan" na todong sinusuportahan ng Malakanyang bilang pinapaburang paraan ng pagbabago sa reaksyunaryong konstitusyon.



Taon XXXVII Blg. 9 Mayo 7, 2006

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.org

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial	1
Matatagumpay na opensiba ng BHB	3
Buuin ang mga YPB	4
Mga Tungkulin ng mga YPB	5
Gloria Rice sa Cagayan Valley	5
Gloria Arroyo, hinatulang maysala	6
Presyo ng langis, muling sumirit	7
Pananalanta ng pasistang estado	
Paglabag sa karapatang-tao patuloy sa Bikol at Southern Tagalog	8
Pagsupil sa mga manggagawa	9
Pagsikil sa masmidya	9
Insulto sa Mayo Uno	10
Balita	11

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas



Puspusang itinutulak ni Arroyo ang "chacha" sa layuning baguhin ang lahat ng alituntunin at pawalambisa ang lahat ng mga nakaraang ligal na kaso laban dito. Magiging ang posibilidad ng panibagong *impeachment* ay mawawalan na rin ng saysay. Mapapawalang-saysay maging ang mga "bahagyang tagumpay" sa mga nakaraang desisyon ng Korte Suprema.

Sa ilalim ng bagong konstitusyong ninanais ni Arroyo, magiging ligal na ang malaon na niyang inaasam na pagpapalawig sa kanyang termino, pagbibigay-daan sa higit na awtokratikong paraan ng pamumuno niya, pagbabawas pa sa mga kalayaang sibil at pagpapasahol ng mga pasistang istruktura at lubos na pagbubukas ng Pilipinas sa imperyalistang pandarambong at interbensyong militar.

Tiyak na sisikapin ni Arroyo at mga tapat niyang tagapagtanggol sa Korte Suprema na ilusot sa "paraang umaayon sa konstitusyon" ang "cha-cha"—*mapa-people's initiative* man ito o *constituent assembly*.

Dapat puspusang ilantad at labanan na ang mga paghahanda at sabwatan na magbibigay-daan sa mga ito. Ang paglaban sa mga maniobrang ito ay mahigpit na nakakawing sa pagpapaigting sa pakikibaka ng mamamayan laban sa bulok, papet at pasistang rehimeng Arroyo.

Dapat paghandaan ng demokratikong kilusang masa at buong rebolusyonaryong kilusan ang gayong pagpihit sa sitwasyon. Wala nang mas iinam pang paraan ng paghahanda kundi ang ibayong pagsusulong ng rebolusyonaryong kilusan at armadong pakikibaka, at kaalinsabay, ang ibayong pagpapalawak at pagpapalakas sa paglaban ng malawak na kilusang masa at nagkakaisang prenteng anti-Arroyo. AB

17 riple, nasamsam sa reyd ng BHB sa Bulacan

LABIMPITONG riple ang nasamsam ng Bagong Hukbong Bayan (BHB) nang salakayin nito ang detatsment ng Philippine Army-CAFGU sa Barangay Pinuangan, Obando, Bulacan noong Abril 22. Nakumpiska ang 10 M14, dalawang M16, tatlong karbin at dalawang Garand, bukod sa mga bala at mga gamit pangkomunikasyon.

Naisagawa ang reyd nang hindi man lamang nagpapaputok ang mga gerilya. Umatras sila gamit ang tatlong bangkang de-motor.

5 armas nasamsam, 3 pwersa ng kaaway napatay sa mga ambus sa Leyte at Samar

LIMANG riple ang nasamsam ng mga Pulang mandirigma habang tatlong elemento ng kaaway ang napatay sa dalawang magkahiwalay na ambus sa Samar at Leyte nitong Mayo 6. Tatlo rin ang nasugatan sa mga pananambang na ito.

Sa Samar, limang M16 ang nakumpiska ng BHB nang ambusin nito ang isang tim ng mga nagpapatrulyang pulis sa pagitan ng mga bayan ng Bonghon at Malaintos sa prubinsya ng Eastern Samar. Isang pulis ang napatay at isa ang nasugatan sa pananambang na ito.

Sa Leyte, dalawang sundalo ang napatay at dalawa ang nasugatan nang ambusin ng BHB ang mga elemento ng 19th IB na lulan ng isang Toyota Town Ace van sa pagitan ng mga baryo ng Casilion at Boga Boga sa bayan ng Villaba.

8 tropa ng kaaway, patay sa mga pananambang ng BHB sa Bicol

WALONG sundalo at mga elemento ng CAFGU na pawang mula sa 22nd Infantry "Cadre" Battalion ng 901st Bde 9th ID ang namatay samantalang apat pa ang nasugatan nang dalawang beses ambusin ng mga Pulang mandirigma ang yunit na ito ngayong Abril.

Naganap ang pinakahuling ambus sa Mauraro, Guinobatan, Albay nitong Abril 23, kung saan apat na elemento ng kaaway ang napatay. Isang riple rin ang nasamsam.

Sa kabilang banda, isang gerilya ang nasugatan sa labanang ito.

Isang kilometro lamang ang layo ng kampo ng Alpha Coy ng 65th IB sa pinangyarihan ng labanan. Agad itong nakapagpadala ng reim-porsment, subalit nakaatras ang BHB nang walang malaking pinsala.

Bago ito, dalawang sundalo at dalawang elemento ng CAFGU mula sa naturang yunit ng kaaway ang napatay nang ambusin naman sila ng Celso Minguez Command ng BHB sa Barangay Batang, Irosin, Sorsogon noong Abril 20. Ang mga tinambangang pwersa, na nagsasagawa noon ng "strike operation" ay pinasabugan ng *land mine* ng BHB. Sinundan pa ito ng dalawang granada at nagsasalimbayang putok ng mga M16 ng mga Pulang mandirigma. Bukod sa mga napatay, apat pang elemento ng kaaway ang nasugatan. Nakaatras nang walang kaswalti ang BHB. AB

Buuin ang mga Yunit Pananggol sa Baryo

Isinusulong ngayon ng Partido Komunista ng Pilipinas at ng Bagong Hukbong Bayan ang malawakang pagbubuo ng mga yunit pananggol sa baryo (YPB) para magsilbing malaking karagdagang bultong pwersa ng digmang bayan sa Pilipinas, kasabay ang pagpapalakas at pagpapalawak pa ng pagtatayo ng mga milisyang bayan at mga buong-pamahong yunit gerilya ng BHB.

Tulad ng milisya, ang YPB ay kabilang sa bag-as ng pwersang pananggol-sa-sarili ng masa at tumutulong para sa organisado at lubos na mobilisasyon sa pagtatanggol ng mamamayan kapag inaatake ng kaaway. Ang dagdag na pagpapalaganap ng YPB ngayon ay mahalagang aspeto sa ibayong pagpapalaki ng BHB at pagsusulong ng digmang bayan. Malaki ang maitutulong nito lalo ngayong nilulubos ng armadong rebolusyonaryong kilusan ang gitnang subyugto ng estratehikong depensiba patungo sa susunod pang subyugto at mas mataas pang yugto.

Pagbubuo ng YPB

Ang mga YPB, tulad rin ng milisyang bayan ay pormasyong panlaban ng BHB sa hanay ng mamamayan. Tuwiran din itong pinamumunuan ng sangay ng Partido sa baryo. Itinatayo ang mga YPB sa mga baryong nasa antas konsolidasyon, kung saan buo na ang mga komiteng pang-organisa ng mamamayan o kaya'y naitayo na ang mga ganap na samahang masa, may nakatatayo nang milisya at may sangay ng Partido sa baryo.

Tungkulin ng YPB na sumuporta sa mga gawain ng milisya. Ang YPB ay pangalawa sa milisya sa linya ng

mga reserba ng mga pangunahing panlabang yunit ng BHB. Sa pagtatayo ng mga YPB, mapag-aambag ang nakararami sa pagtatanggol ng kanilang mga komunidad, mapagiibayo ang pagpapalaki ng hukbong bayan at mobilisasyon ng masa para sa digma at masisinsin ang organisasyong militar sa hanay ng mamamayan tungo sa pagbubuo ng armadong hukbo ng mamamayan.

Kwalipikadong maging kasapi ng YPB ang sinumang may mahusay na pangangatawan at pag-iisip, di bababa sa 18 taong-gulang at handang pumailalim sa mga alituntunin at disiplina ng BHB. Bawat tim nito ay binubuo ng tatlo hanggang limang boluntir at itinatalaga sa mga purok o sityo o iba pang dibi-

syon sa baryo batay sa pangangailangan sa depensa at sa pasya ng sangay ng Partido sa baryo. Tulad rin ng iba pang rekrut sa BHB, ang mga rekrut sa YPB ay pangunahing nagmumula sa mga rebolusyonaryong organisasyong masa sa baryo at may kapasyahang kumilos sa armadong rebolusyon—habang nagpapatuloy sa kanilang pang-araw-araw na pangkabuhayang produksyon. Pinaiilalim sila sa karampatang pag-aaral pang-ideolohiya at pagsasanay-pampulitika at -pangmilitar. Tinitiyak ng sangay ng Partido sa baryo ang pag-aaral pampulitika at pang-ideolohiya ng mga YPB, gayundin ang mga patakaran at programa para sa mga YPB.

Ang YPB, milisya at komite sa depensa

Ang sentro de grabidad ng BHB sa baryo ay ang milisya. Tungkulin ng milisya na magbigay ng pampulitika-militar na pagsasanay sa mga YPB, ikoordina at pakilusin ang mga ito para sumuporta sa mga tungkulin ng milisya at organisadong depensa ng baryo. Ang mga timlider at/o pangalawang timlider ng mga YPB sa baryo ay maaaring ipatawag sa mga pulong ng kumand ng milisya. Kasabay nito, maaaring tuwirang ikumand ng platoon ng BHB na sumasaklaw sa erya kapwa ang milisya at YPB sa baryo.

Ang mga komite sa depensa ng rebolusyonaryong organisasyong masa sa baryo, kaiba sa mga YPB ay hindi pormasyong gerilya ng BHB sa hanay ng mama-



mayan. Ang mga komiteng ito ay depinidong istruktura sa loob ng rebolusyonaryong organisasyong masa na nagtitiyak sa sariling pangangalaga sa kaligtasan ng rebolusyonaryong organisasyong masa.

Gayunman, kung kinakailangan para sa pagtatanggol ng baryo at mas malawakang mobilisasyong masa para sa digma, ang mga komite sa depensa ng mga rebolusyonaryong organisasyong masa sa baryo ay pwedeng mobilisahin ng milisya at YPB sa pamamagitan ng pakikipagkoordinang sangay ng Partido at pamunuan ng nauukol na rebolusyonaryong organisasyong masa sa baryo. AB

Mga Tungkulin ng mga YPB:

1. Pangalagaan ang kaligtasan ng mga organisasyong masa at baryo laban sa mga ahente ng kaaway at mga traydor.
2. Pangalagaan ang kaligtasan ng baryo kapag may operasyon ang kaaway.
3. Sumuporta sa mga tungkulin ng milisya sa baryo kabilang na ang pangangalaga sa kaayusan at katahimikan ng baryo at laban sa mga aktibidad ng masasamang elemento.
4. Magsilbing isang bisig sa pagsubaybay sa pagpapatupad sa mga patakarang antipyudal at iba pang patakaran ng demokratikong gubyernong bayan laban sa mga kaaway sa uri.
5. Magsilbing *marshall* sa masang mamomobilisa sa kanilang saklaw sa mga aksyong masa.
6. Maging katuwang ng milisya upang sumuporta sa mga pangangailangan sa likuran (*rear*) ng mga yunit ng BHB tulad ng pagkakampo, pangangalaga sa sugatan at maysakit, tulong sa paghahanda at aktwal na pagsuporta sa mga aksyong militar ng BHB at iba pang tungkuling iaatas ng pwersang gerilya ng BHB na kumikilos sa larangang gerilya.
7. Magsilbing reserbang pwersa ng mga yunit gerilya ng BHB. AB

Gloria Rice sa Cagayan Valley

Ibayong gutom at pagkalugi ng mga magsasaka

Ipinangalandakan ng rehimeng Arroyo noong 2004 ang *hybrid* na Gloria Rice bilang solusyon sa malawak na karalitaan at kagu-

tuman sa kanayunan. Ngunit sa karanasan ng Cagayan Valley, ibayong gutom at lalong pagkalugi ang inihatid ng diumano'y "bigas ng masa."


Bago naging presidente si Arroyo, 5,000 ektarya lamang ng palayan sa Pilipinas ang natatamnan ng *hybrid* na palay, ayon sa Department of Agriculture (DA). Sa ilalim ng Agricultural Modernization Program ng rehimeng Arroyo, tinarget nitong matamnan ng *hybrid* na palay ang 600,000 ektarya pagdating ng 2005, at pinondohan ito ng P20 bilyon bawat taon.

Kapag nagtanim ng Gloria Rice, anang rehimen, hindi na kakailanganing mag-angkat ng bigas. Umakyat sa 100,000 ektarya ng sakahan ang natamnan ng Gloria Rice pag-sapit ng Pebrero 2004.

Mula sa iba't ibang mga *hybrid* ng Gloria Rice-Mestizo, SL-9/SL8H, Magilas 500, Bigante at Rizalina 28-ang SL8H ang laganap na itinanim ng mga magsasaka sa Cagayan Valley noong 2005.

Sinamantala ng rehimen ang pagkakawasak ng mga pananim ng mga magsasaka sa buong rehiyon para itulak ang Gloria Rice. Pagkatapos ng bagyong Igme na sumalanta sa mahigit P1 bilyong pananim lalo na sa Cagayan, ipinuslit ang mga *hybrid* na binhi ng mais, gulay at palay-kabilang ang Gloria Rice. Ibinenta ito ng DA at mga komersyante-usurero sa mga magsasaka sa halagang P550, na ayon sa kanila'y presyong may diskawnt. Gloria Rice at iba pang *hybrid* ang inutang ng mga kapit-sa-patalim na magsasaka dahil ito lamang ang klase ng binhing ipinautang ng mga usurero matapos ang kalamidad, at wala namang mahintay na ibang tulong mula sa gubyerno.

Ngunit nang maubos ang unang batch ng Gloria Rice na ibinenta sa relatibong mababang presyo, ibinenta na ng mga komersyante ang



mga susunod na *batch* sa ₱1,250 bawat bag na naglalaman ng 20 kilo lamang ng binhi.

Kunwa'y tutulong sa mga nasalanta ng bagyo, ngunit ang totoo'y ginamit ng gubyerno ang kalamidad upang maipataw sa mga magsasaka ang isa pang delubyo-ang *hybrid* na mga binhi-sa tulong ng mga komersyante-usurero.

Nangangailangan ang Gloria Rice, gaya ng iba pang *hybrid* na binhi, ng katakut-takot na abono at pestisidyo upang makaani ang mga magsasaka. Sa kabuuan, mangangailangan ang "pangmasa" raw na binhing ito ng di bababa sa limang sako ng Urea [₱750 kada bag], apat na sako ng 14-14-14 [₱800 kada bag] at 100 ml ng Planergy kada ektarya-siyam na bag at halos tatlong pakete ng abono. Kailangan pang *mag-spray* ng pamatay-pesto na BLB Stopper nang apat na beses sa buong pagtatanim. Mahaba at mahirap din ang proseso ng paghahanda ng pagtatanim ng Gloria Rice kumpara sa katutubong palay.

Hindi nagkatotoo ang ipinangako ng rehimen sa mga magsasaka na 200 kabang ani kada ektarya sa

kalagayang atrasado ang agrikultura sa Cagayan at kulang na kulang sa imprastruktura. Nitong huling taniman sa Cagayan at iba pang prubinsya ng Cagayan Valley, nangalugi ang mga magsasakang nagtanim ng Gloria Rice dahil sa hindi mahusay na pagtubo ng palay, napakataas na gastos at napakabusising proseso ng pagtatanim nito. Naiwan sa kanila ang libu-libong pisong utang na hindi mabayaran.

Lalong nalugmok sa mataas na utang ang mga magsasaka dahil sa Gloria Rice. Samantala, tiba-tiba ang mga dayuhang korporasyong agrikemikal na nagbebenta ng mga abono at pestisidyo, pati na ang mga ahente nilang komersyante-usurero, at ang rehimen ng Arroyo na tagapagtaguyod ng kanilang mga interes.

Malulutas nga ba ng Gloria Rice ang malawak na kagutuman at kawalang lupa? Pinatutunayan ng karanasan ng mga magsasaka sa Northern Luzon na hindi. Hangga't nananatiling uugud-ugod ang agrikultura sa bansa sa ilalim ng imperyalismo at paghahari ng mga burukrata-kapitalistang gaya ni Arroyo, mananatiling gutom at nagdarahop ang laksang mamamayan. **AB**

Ika-22 selebrasyon ng Araw ng Cordillera

Gloria Arroyo, hinatulang maysala

Hinatulang *guilty* o maysala ng Cordillera Peoples' Tribunal ang rehimen ng Arroyo sa mga kasong terorismo ng estado at pambansang pang-aapi. Ang Cordillera Peoples' Tribunal ay binubuo ng mga kinatawan ng mga lider ng

mga pambansang minorya at iba't ibang sektor sa Cordillera. Ang Tribunal ang pinakatampok na aktibidad sa selebrasyon para sa ika-22 taong Araw ng Cordillera na ginanap noong Abril 23-24 sa Ag-agama, Western Uma, Lubuagan, Kalina.

Ito ang ikalawang pagkakataon na nagsagawa ng paglilitis ang mamamayang minorya sa Cordillera. Ang una ay noong 1989 nang si Conrado Balweg, lider ng Cordillera Peoples' Liberation Army (CPLA) ay nilitis sa kasong pakikipagsabwatan sa rehimen ng Aquino sa pagpapatupad ng patakarang "*totar war*," at mga pagpaslang sa mga sibilyan, kabilang na si Ama Daniel Ngrayan, respetadong lider ng Kalinga na kasama ni Macliling Dulag sa pakikibaka laban sa Chico dam noong panahon ng diktadurang Marcos.

Pitong kaso ang isinampa ng


mamamayan mula sa iba't ibang prubinsya ng Cordillera laban kay Arroyo:

1. Paglabag sa karapatan ng mga pambansang minorya sa kanilang lupang ninuno at pinagkukunan ng kabuhayan sa pamamagitan ng pagpapapasok ng rehimen sa malalaki at mapaminsalang mga minahan at dam;

2. Paglabag sa karapatan ng mga minoryang magsasaka sa pamamagitan ng pagtutulak sa liberalisasyon ng agrikultura na nagpapapasok ng imported na mga gulay na pumapatay sa lokal na industriya ng gulay;

3. Komersyalisasyon ng kultura ng mga pambansang minorya sa pamamagitan ng pagsasagawa ng iba't ibang *festival* na nagsisilbi lamang sa turismo;

4. Paglabag sa karapatang pangkabuhayan ng mga maralita ng lunsod at mga manggagawa sa pamamagitan ng mababang pasahod,



pagkakait sa kanila ng kasiguruhan sa trabaho at demolisyon ng kani-lang mga bahay;

5. Pagpapabaya at pagkakait ng guberno ng mga serbisyong pangkalusugan, pang-edukasyon at iba pang batayang serbisyo;

6. Militarisasyon; at

7. Pampulitikang panunupil sa progresibong kilusang masa sa Cordillera at pamamaslang sa mga lider at myembro nito.

Inilahad ng mga delegado mula sa iba't ibang prubinsya ang mga ebidensyang nagpapatunay sa mga kasong isinampa nila sa pamamagitan ng mga katutubong kanta at tula at pagsasadula ng mga pang-yayari tulad ng paniniktik sa mga ligal na opisina, pagpatay ng militar sa isang magsasaka sa Mountain Province, gayundin ang pagpaslang sa tatlong lider aktibista na sina Romeo Sanchez, Jose "Pepe" Manegdeg at Albert Terredaño. Si Sanchez, Bayan Muna *coordinator* ng Ilocos ay pinaslang noong Marso 2005. Sina Manegdeg, tagapagtaguyod ng karapatang-tao, at si Terredaño, isang unyonista, ay pinaslang noong Nobyembre 2005.

Dahil sa bigat ng mga ebidensya laban kay Arroyo, hinatulan siyang maysala at sinentensyahang maalís sa pagkapangulo at managot sa mga kasong isinampa sa kanya. *Fetad* (digmang tribo) ang idineklara ng lupon na parusang nararapat na ipataw kay Arroyo. Sinang-ayunan ito ng mga lider minorya at mandirigma ng mga tribo sa iba't ibang prubinsya ng Cordillera sa pamamagitan ng pagsasagawa ng sayaw pandigma (*war dance*). Isang imahen (*effigy*) ni Arroyo ang pinagsisibat ng mga katutubong mandirigma.

Pagkatapos ng paglilitis, pinaranganan ang mga martir ng Cordillera. Nagpahayag ang mga anak ni Sanchez na ipagpapatuloy nila ang nasimulan ng kanilang ama, samantalang nanawagan ng hustisya para sa pagkakapaslang ng kanyang asawa ang maybahay ni Terredaño.

Isang muhon naman ang pinasinayaan sa Cagaluán, PasiL, Kalínga bilang parangal kay Ama Ngayaan, na dinukot at pinatay ng CPLA noong Oktubre 5, 1987 sa Cagaluán. Hanggang ngayong di pa


natatagpuan ang kanyang mga labi. Ang muhon ay nagsisilbing paalala sa mga naging sakripisyo at kontribusyon ni Ama Ngayaan sa kilusang masa para sa pagtatanggol sa lupa, buhay at kayamanan ng mga pambansang minorya sa Cordillera.

Nanawagan din ang mga nagsidalo na ibasura ang Philippine Mining Act of 1995, itigil ang militarisasyon at etnosidyo, itigil ang pampulitikang panunupil at Oplan Bantay Laya at ilantad at tutulan ang "cha-cha."

Sa huling gabi ng selebrasyon, itinanghal ng Dap-ayan ti Kultura ti Cordillera ang dulang "Panagsubli" ("Pagbabalik") na sumasalamin sa mga isyu at problemang kinakaharap ng mga mamamayan sa Cordillera at ang panawagan sa kanila upang kumilos at lutasin ang mga ito.

Umabot sa halos 4,000 delegado ang dumalo mula sa iba't ibang panig ng bansa. Halos 70 ring delegado mula sa Taiwan, Belgium, Malaysia, Japan, US, Canada, Australia, Germany at Denmark ang nakibahagi sa selebrasyon. **AB**

Presyo ng langis, muling sumirit



Halos dalawang linggo nang hindi lumalayo sa \$75 bawat bariles ang presyo ng krudong langis sa New York Mercantile Exchange. Ito na ang pinakamataas na presyong inabot ng krudong langis sa kasaysayan. Bago ito, ang pinakamataas na presyong inabot ng krudong langis ay \$60 bawat bariles noong Agosto 2005 bunga ng ispekulasyon at manipulasyon ng mga kumpanya ng langis sa presyo ng mga produktong petrolyo kaugnay ng pananalasa ng Hurricane Katrina sa US.

Sa Pilipinas, umabot na sa ₱37.79 hanggang ₱39.26 ang presyo ng bawat litro ng *premium unleaded gasoline*. Ang *diesel* naman ay mula ₱32.79 hanggang ₱34.42 bawat litro ang presyo, at ang

gaas, ₱35.60 hanggang ₱38 bawat litro.

Isinasangkalan ngayon ng mga kumpanya ng langis ang tensyong ibinubunga ng pagbanta ng US ng gera laban sa Iran dahil sa pagtanggì ng gubyernong Iran na itigil ang pagpapaunlad nito ng kapasidad sa paglilikha ng elektrisidad mula sa prosesong nukleyar—na karapatan lamang nito, sa kabila ng pilit na pagpipigil dito ng US sa takot na makapagsisilbing tuntungan ito sa pagkakaroon ng Iran ng kapasidad para makagawa ng armas nukleyar.

Ang totoo, ang kasakiman pa rin ng mga dambuhalang kumpanya ng langis ang dahilan ng walang tigil na pagtaas ng presyo ng mga produktong petrolyo. Mula \$1.3 bilyon noong huling kwarto ng 2005, umabot sa \$4 bilyon ang ganansya ng Chevron nitong

unang kwarto ng 2006 (o gahiganteng 49% na pagtaas). Ang Chevron ang pinakamalaking kumpanya ng langis sa buong mundo.

Umabot din sa \$15.7 bilyon ang pinagsamang ganansya ng Chevron, Exxon Mobil Corp. at Conoco-Phillips noong unang tatlong buwan ng taong ito, 17% mas mataas sa pinagsama nilang ganansya noong unang kwarto ng 2005. Sa katunayan, \$64 bilyon ang kabuuang kita (*gross revenues*) ng tatlong kumpanya sa buong 2005.

Kung pagsasama-samahin ang kabuuang kita ng mga kumpanyang ito nitong unang kwarto, aabot ito sa \$191.5 bilyon—mas malaki kaysa sa *gross domestic product* ng 189 bansa, kabilang ang Chile, Denmark, Peru at Venezuela.

Ang kaakibat na pagtaas ng presyo ng mga produktong petrolyo sa Pilipinas ay nagbunsod na ng minimum na 30-40 sentimong pagtaas sa presyo ng bawat kilo ng mga produktong pang-agrikultura tulad ng bigas, manok, karneng baboy, tilapya at iba pa.

Dahil dito, muling nanawagan ang mga kinatawan ng mga progresibong partido sa Kongreso na pawalambisa na ang Downstream Oil Deregulation Law at sa halip ay magpataw ng mga kontrol sa presyo para mapigilan ang arbitrar-yong pagtataas ng mga kumpanya ng langis sa presyo ng mga produktong petrolyo.

Iginigiit din ni Congressman Crispin Beltran, kinatawan ng Anakpawis, na isabatas na ang P125 pagtaas sa arawang minimum na sahod para maibsan ang tindi ng pagtaas ng presyo ng langis sa mga konsyumer.

Samantala, inianunyo ng Piston na maglulunsad ito ng tigilpasada linggu-linggo simula ngayong Mayo para igiit sa rehimeng Arroyo ang pagbabasura sa batas sa deregulasyon ng industriya ng langis. **AB**




Paglabag sa karapatang-tao, patuloy sa Bikol at Southern Tagalog

Patuloy ang mga kaso ng paglabag sa karapatang-tao, laluna sa Bikol at Southern Tagalog.

Pinakahuling mga biktima sina Ronald Comercias, 26 at Jesus Bustinera, 62, kapwa mga magsasaka mula sa Barangay Caranday-La Purisima sa Baao, Camarines Sur.

Si Comercias ay natagpuang patay malapit sa kanyang bahay matapos dukutin ng mga nakamaskarang armadong tao bandang alas-9 ng gabi noong Abril 28. Nagtamo siya ng maraming tama ng bala sa katawan.



Naunang dinukot noong Abril 26 ng gabi si Bustinera. Ayon sa mga nakasaksi, dinakip siya ng may 20 nakamaskarang tao na pawang may malalakas na armas. Natagpuan siyang patay at tadtad ng saksak ang katawan noong madaling araw ng Abril 27, mga kalahating kilometro ang layo mula sa pinagdukutan sa kanya.

Noong Abril 27, pinaslang sina Jayson Delen, *secretary-general* ng Bayan Muna-Camarines Sur at Jim Mirafuentes, myembro ng Bayan Muna. Pinatay si Delen ng mga nakamotorsiklong lalaki sa Gubat, Daet, Camarines Sur bandang 9:45 ng umaga samantalang si Mirafuentes ay pinagbabaril sa Daraga, Albay bandang alas-9 ng umaga.

Ang mga pamamaril na ito ay naganap limang araw matapos barilin si Marilou Rubio at ang kapatid niyang lalaki, parehong kasapi

ng Bayan Muna sa General Nakar, Quezon.

Samantala, iginiit sa militar at pulisya ng mga kamag-anak ng tatlong magsasakang dinukot noong Abril 28 na ilitaw sila. Dinukot sina Aristedes Sarmiento, Alejandro Axel Pinpin at Riel Custodio sa Barangay Sungay, Tagaytay City kasama ang dalawa pang residente ng Tagaytay na sina Enrico Ybanez, 59 at Michael Masayes, 26. Sina Sarmiento, Pinpin at Custodio, pawang mga kasapi ng Kalipunan ng mga Magbubukid sa Kabite (Kamagsasaka-Ka) ay dinukot ng mga operatiba ng PNP at Naval Intelligence, dinala sa isang *safehouse*, pinagbawalang maki-pag-ugnayan sa kanilang mga pamilya at abugado at isinailalim sa interogasyon. Laking gulat ng kanilang mga kamag-anak nang bigla silang iprisinta ng militar sa telebisyon nitong Mayo 1 bilang mga kasapi umano ng Bagong Hukbong Bayan na plano raw magsagawa ng mga pambobomba sa Metro Manila.

Iniulat din ng KARAPATAN-Quezon na patuloy na ibinibimbini ng PNP ang 14 na magsasaka na hinuli noong Abril 30 sa isang

tsekpoynt sa Barangay Ajos, Catanduanan. Dalawa sa mga hinuli ay mga *researcher* ng Kalipunan ng Magbubukid sa Ti-

mog Katagalugan samantalang ang 12 ay mga kasapi ng KOMPRAN-Quezon. **AB**





1 patay, 5 sugatan sa pamamaril ng AFP sa Antique

ISANG 65 anyos na ginang ang napatay at lima ang nasugatan, kabilang ang dalawang bata nang pagbabarilin sila ng mga elemento ng 31st Reconnaissance Coy nitong madaling araw ng Mayo 6 sa Panpanan I, San Remigio, Antique.

Napatay sa pamamaril si Epifania Cabaya, habang nasugatan ang kanyang asawa at apat pang kapamilya. Ayon sa mga panimulang ulat, namataan umano ng mga nagpapatrulyang sundalo ang isang grupo ng mga armadong lalaki sa baryo, kaya namaril sila sa paniniwalang mga gerilya ng BHB ang kanilang mga nakita. Pawang mga di armadong sibilyan ang naging biktima ng kanilang pamamaril. **AB**

2 progresibong lider, dinukot

DALAWA pang lider ng mga progresibong organisasyon ang dinukot kamakailan at hindi pa rin natatagpuan hanggang ngayon.

Dinukot ng dalawang armadong lalaki nitong Mayo 5 bandang alas-2 ng umaga si Benedicto Magdaong, 52, tserman ng Anakpawis sa Barangay Marisol, Angeles City.

Bago ito, dinakip din ng apat na armadong lalaki noong Abril 30 si Brian Macalisang, 16, lider ng Anakbayan, habang patungo siya sa bayan ng Lakewood mula sa Tukuran, Zamboanga del Sur. **AB**

Sistematikong pagsupil sa mga manggagawa, binatikos

Pinangunahan nitong unang linggo ng Mayo ng International Labor Rights Fund (ILRF), isang grupo ng mga abugado sa US na nagtataguyod sa karapatan ng mga manggagawa ang International Labor Solidarity Mission (ILSM), isang imbestigasyon ng mga kaso ng paniniil sa uring manggagawa, iba pang anakpawis at mga tagasuporta nila. Binubuo ang ILSM ng 30 delegado mula sa 12 bansa. Nagsagawa ito ng imbestigasyon mula Mayo 2 hanggang 6 sa Central Luzon, Southern Tagalog, Negros at Southern Mindanao kung saan pinakamatingkad ang mga pagpatay sa mga lider at kasapi ng unyon at pagsikil sa mga karapatang manggagawa.

Bunga ng kanilang imbestigasyon, binatikos ng ILSM ang rehimeng Arroyo sa sadya nitong paglikha ng mga kundisyon para maganap ang malawakang mga paglabag sa karapatang-tao, laluna sa mga progresibong organisasyon. Anang ILSM, ang gayong mga kalupitan ay nangyayari kaakibat ng palagiang pagbabansag ng rehimeng Arroyo sa mga progresibong organisasyon bilang mga prente ng mga komunista, at sa gayo'y mga kaaway ng estado.

Iginiit ng ILSM sa gubyernong Arroyo na itigil ang mga pamamaslang at pampulitikang panunupil at nanawagan ito sa pandaigdigang komunidad na ipresyur ang rehimen para wasakin nito ang umiiral na kalakaran ng pagkakanlong at di pagparusa sa mga lumalabag sa karapatang-tao.

Ayon sa mga delegado ng ILSM, pumapangalawa na ngayon ang Pilipinas sa Colombia sa dami ng mga kaso ng pagpaslang sa mga manggagawa. Animnapung unyonista, lider manggagawa at tagapagtaguyod ng mga karapatan sa paggawa ang napaslang na mula nang manungkulan si Gloria Arroyo noong 2001. Dalawampu't isa o 35% sa mga biktima ang pinatay sa loob lamang ng Setyembre 2005 hanggang Marso 20. **AB**




**PANUNUPIL
SA MGA
MANGGAGAWA
ITIGIL!**

Pagsikil sa masmidya sa Pilipinas, binatikos ng iba't ibang grupo

Binatikos ng iba't ibang lokal at pandaigdigang organisasyong nagtataguyod sa kalayaan sa pamamahayag ang gubyernong Arroyo dahil sa lumalalang paniniil sa masmidya sa Pilipinas. Dumagsa ang mga batikos sa okasyon ng paggunita sa World Press Freedom Day nitong Mayo 3.

Ayon sa National Union of Journalists of the Philippines (NUJP), mula 1986 ay umaabot na sa 77 mamamahayag ang pinapatay sa Pilipinas, at 40 rito (o 52%) ang pinaslang sa loob ng limang taong panunungkulan ni Arroyo. Wala kahit isa sa mga salarin ang nahatulan, ayon sa NUJP. Pinakahuling biktima si Nicolas Cervantes, 66, isang komentarista mula sa Surigao City na pinaslang nitong Mayo 2.

Ayon naman sa Philippine Press Institute, nagpapatuloy ang paniniil ng rehimeng Arroyo sa masmidya dalawang buwan matapos bawiin umano



nito ang *state of national emergency* na ipinatupad noong huling linggo ng Pebrero. Tinukoy nito ang utos ni Justice Secretary Raul Gonzales na kasuhan ng *inciting to sedition* ang Probe Team, isang premyadong programang pantelebisyon dahil sa pag-interbyu nito sa isa sa mga sundalong lumahok sa pag-aalsang Oa-wood noong 2003.

Sa tindi na ng paniniil sa midya, maging mga dayuhang institusyong sumusubaybay sa kalayaan sa pamamahayag ang bumatikos na sa rehimeng Arroyo. Ayon sa Freedom House, isang *non-profit non-governmental organization* na nakabase sa New York, USA, sa kagustuhan ni Gloria Arroyo na huwag mabun-yag sa publiko ang mga nagawa niyang krimen laban

sa bayan ay sinisiil niya ang kalayaan sa pamamahayag at umaangkin ng iba pang maladiktador na mga kapangyarihan.

Nagpahayag na rin ng pagkabahala ang Senado ng US sa kasalukuyang kalagayan ng mga mamamahayag sa Pilipinas. Hiniling ni Sen. Richard Lugar, tagapangulo ng Senate Foreign Relations Committee na hulihin na ng gubyernong Arroyo ang mga responsable sa pagpatay sa mga Pilipinong mamamahayag.

Samantala, kabalintunaan naman ang ginawa ng Armed Forces of the Philippines noong mismong World Press Freedom Day nang magpataw ito ng karagdang mga restriksyon sa kilos ng mga mamamahayag na kumokober sa Camp Aguinaldo. AB

"Regalo" ni Arroyo sa mga manggagawa Insulto sa Mayo Uno

Gaya ng dati, insulto muli ang napala ng mga manggagawa kay Gloria Arroyo nitong Mayo Uno. Sa halip na aprubahan ang malaon nang iginigiit ng mga manggagawa na P125 umento sa arawang sahod, inianunsyo ng rehimeng Arroyo ang P40 bilyong "regalo" umano sa mga manggagawa.

Subalit tulad ng dati pang mga pangako ni Arroyo sa mga manggagawa, hungkag ang kanyang pinakahuling "regalo."

Ang P20 bilyon para sa umento umano sa sweldo ng mga empleyado ng gubyerno ay magkakatatotoo lamang sakaling maipasa ang batas para sa *salary standardization* na nakasalang pa sa Kongreso. Kung sakali, sa susunod na taon pa ito

maaaring maipapasa.

Wala ring bago sa pagsuspindi sa mga multa o surcharge sa mga hindi nakapagbabayad ng kanilang mga utang sa SSS at GSIS. Dati na itong ginagawa ng naturang mga ahensya sa tuwi-tuwina dahil nga sa kahirapan nilang maningil ng utang sa mga kinakapos na rin nilang myembro.

Ultimong ang P224 milyong benepisyo umano para sa kalusugan ay kakarampot at masyado nang nahuhuli kung ihahambing sa napakalaking pangangailangan ng mamamayan. Lalong maliit ito kumpara sa P500 milyong inilaan para sa pagsasanay sa mga magiging empleyado ng *call centers*.

Limang taon nang hinihingi ng mga manggagawa ang dagdag na P125 sa minimum na arawang sahod at P3,000 umento para sa mga kawani ng gubyerno, pero puro hungkag na pakunswelo ang ibini-bigay ni Arroyo.

Kung tutuusin, kulang pa nga ang P125 bawat araw na hinihinging umento sa bilis ng pagsirit ng presyo ng mga pangunahing bilihin. Ayon sa pagtaya ng IBON Foundation, P635.81 na ang kinakailangan ng isang anim kataong pamilya sa Metro Manila noong Hulyo 2005 para mabuhay nang disente. Kulang din ang mga benepisyo ito para himukin ang mga Pilipinong manggagawa na huwag nang mangibang-bayan para lang maghanap ng trabaho.

Walang anumang pagpapahala-

Sundan sa "Insulto..." sa pahina 11



"Batasan 5", makalalabas na

WALANG nagawa ang rehimeng Arroyo kundi hayaang lumabas sa Batasan Complex ang tinaguriang "Batasan 5" sa harap ng pagbabasura ng korte sa dagdag na impormasyong inihain ng Department of Justice (DOJ) na magsasangkot sana sa kanila sa kasong rebelyong isinampa laban kina Cong. Crispin "Ka Bel" Beltran at 1Lt. Lawrence San Juan. Alinsunod sa kautusan ni Justice Secretary Raul Gonzales na ipinasa nitong Mayo 7 kina DILG Secretary Ronaldo Puno at PNP Dir. Gen. Arturo Lomibao, maaari nang lumabas ang "Batasan 5" nang walang pangambang aarestuhin sila.

Inilabas ang kautusan pagkatapos magsagawa ng *emergency meeting* ang National Security Council sa Malakanyang tungkol sa plano ng "Batasan 5" na lumabas sa Batasan sa Mayo 8 kahit pa sila hulihin.

Ibinasura nitong Mayo 4 ng Branch 137 ng Makati City Regional Trial Court ang dagdag na impormasyong isinumite ng DOJ upang maisama sa kasong rebelyon laban kina Beltran ng partidong Anakpawis at Lieutenant San Juan sina Cong. Satur Ocampo, Teddy Casiño at Joel Virador ng Bayan Muna, Rafael Mariano ng Anakpawis, Liza Maza ng Gabriela Women's Party at

46 na iba pa.

Ayon sa hukuman, ang kasong rebelyong isinampa kina Beltran at San Juan ay nakaangkla lamang sa pakikisabwatan umano ng mga rebeldeng militar at mga lider ng Partido Komunista ng Pilipinas (PKP) upang pabagsakin sa poder ang rehimeng Arroyo noong Pebrero. Sa di pagtanggap ng korte sa dagdag na impormasyon ng DOJ, sinabi nito sa esensya na hindi napatunayan na nakipagsabwatan nga ang "Batasan 5" sa plano umanong kudeta laban kay Arroyo noong panahong iyon, at sa gayo'y wala silang kinakaharap na kaso.

Lider aktibista, naninindigan laban sa Malakanyang

"WALA akong pinagsisisihan. Bakit naman po ako magsisisi?" Ito ang tugon ni Ma. Theresa Pangilinan sa banta ni Sec. Raul Gonzales ng Department of Justice na paiimbestigahan niya sa National Bureau of Investigation (NBI) ang umanong pambabastos nito kay Pres. Gloria Macapagal-Arroyo noong Abril 22 sa Indang, Cavite.

Si Pangilinan ay isa sa pitong estudyanteng nagtapos sa Cavite State University (CSU) na sumigaw ng "pekeng presidente" habang nagtatalumpati si Arroyo sa harap ng 1,159 magtatapos na mag-aaral. Natigilan nang isang minuto si Arroyo sa di inaasahang protestang iglap. Bago makakilos ang mga tauhan ng Presidential Security Group at lokal na pulisya upang pahu-

pain ang kilos protesta, sinundan ito ng paglalabas ng mga poster na nagsasabing "No to Cha-cha" (Tutol sa Cha-cha) at "Oust GMA" (Patalsikin si GMA).

Mariing naninindigan si Pangilinan na hindi siya kundi ang nag-aastang pangulo ang malaon nang nambabastos sa mga kabataan-estudyante at sa mamamayang Pilipino sa kabuuan.

Nagtapos si Pangilinan ng kursong Mass Communications sa CSU. Pangulo siya ng kanilang Central Student Government at Student Representative siya sa Board of Regents. Secretary general din siya ng National Union of Students of the Philippines-Southern Tagalog at manunulat ng kanilang pampaaralang pahayagan.

"Insulto...", mula sa pahina 10

ga ang rehimeng Arroyo sa mga manggagawa. Bagkus, ang pinahahalagahan nito ay ang muling pagtutol ng mga negosyanteng burgis kumprador sa dagdag na pasahod sa pagdadahilang nalulugi raw sila kahit limpak-limpak na tubo ang kanilang tinatabo.

Sa buong kapuluan, binatikos ng mga manggagawa ang mga pakitang-taong benepisyo ng rehimeng Arroyo. Iginiit nila sa mga

ANG BAYAN Mayo 7, 2006

martsa't rali sa mga lunsod at sentrong bayan nitong Mayo Uno ang dagdag na sahod, dagdag na trabaho at pagbabagsak sa anti-manggagawa at anti-mamamayang rehimeng Arroyo.

Umabot sa 20,000 manggagawa at tagasuporta nila ang nagtipon sa Recto Avenue, malapit sa Mendiola, habang 12,000 naman ang nagrali sa iba't ibang lugar sa Southern Tagalog. Tatlong libo naman ang dumalo sa mga kilos protesta sa Bacolod City; 2,500 sa

Iloilo City; at 2,000 sa Cebu City. Sa Davao City, nagtipon ang 5,000 demonstrador at 4,000 sa Cagayan de Oro City.

Naglunsad rin ng mga mobilisasyon sa City of San Fernando at Olongapo City sa Central Luzon; Baguio City at Tuguegarao sa Northern Luzon; Legazpi City sa Bicol; mga syudad ng Tacloban at Roxas, sa Kalibo, Aklan at sa San Jose, Antique sa Visayas; at sa mga lunsod ng General Santos at Pagadian sa Mindanao.

MKP: Bukas makipag-ugnayan sa BHB

INIANUNSYO ng mga tagapagsalita ng Makabayang Kawal na Pilipino (MKP) na bukas ito sa pakikipag-ugnayan at pakikipagtulungan sa Bagong Hukbong Bayan (BHB) sa pakikipaglaban upang patalsikin ang bulok na guberno ni Gloria Arroyo.

Sinabi ito ni 1Lt. Sonny Sarmiento, tagapagsalita ng MKP, sa isang panayam sa programang pantelebisyon Probe Team na isi-

nahimpapawid noong Abril 21. Bilang tugon, ipinahayag din ni Gregorio "Ka Roger" Rosal, tagapagsalita ng PKP, na bukas ang BHB at Partido na makipagtulungan din sa MKP dahil itinuturing nila itong signipikanteng positibong pwersa sa loob ng AFP at PNP dahil sa pagtataguyod nito ng mga patriyotiko at demokratikong ideya.

Ipinarinig din sa naturang pro-

grama ang tinig ni 1Lt. Patricio Bumidang. Tulad ni Sarmiento, si Bumidang ay upisyal na sangkot sa pag-aalsang Oakwood noong 2003 at tumakas sa kulungan ng Intelligence Service of the AFP noong Enero.

Kinundena rin ng MKP ang pagpapagamit ng kapwa nilang upisyal sa kampanyang disimpormasyon at paninira ng rehimeng Arroyo at AFP.

Usapang pangkapayapaan, muling idaraos sa Nepal

Nagdeklara ang Communist Party of Nepal (CPN-M) at parlamento ng tigil-putukan at nagkasundong muling buksan ang kanilang usapang pangkapayapaan.

Bago ito, iniurong na ng mga rebolusyonaryong pwersa ang blokeyo sa kabisera ng Kathmandu na ipinatupad nila bilang bahagi ng protesta laban sa batas militar at absolutong monarkiyang ipinataw ni Haring Gyanendra ng Nepal. Napwersa ang hari nitong Abril 24 na muling buksan ang parlamento makaraan ang mahigit dalawang linggo ng malawakan at maiigting na protestang pina-ngunahan ng koalisyong kinabibilangan ng CPN-M at mga ligal na partido.

Subalit sa pakikipagkasundo nito sa bagong bukas na parlamento, nagbabala rin ang CPN-M na agad nitong ibabalik ang blokeyo oras na hindi tumupad ang parlamento sa pagdaraos ng eleksyon sa *constituent assembly* na kabilang sa mga pinagkaisahan ng nagkakaisang prenteng naglunsad ng mga kilos protesta.

Kagyat na adyenda ng bagong bukas na parlamento ang pagdaraos ng eleksyon para sa *constituent assembly* na babago sa konstitusyon ng bansa. Ang pagdaraos ng gayong eleksyon ang pangunahing kahilingan ng sambayanang Nepali sa pangunguna ng CPN-M.

Pagpapasyahan ng bubuuang *constituent assembly* kung pananatilihin ang Nepal sa ilalim ng monarkiya o magtatatag ng republika na siyang iginigiit ng mga pwersang rebolusyonaryo.

Hindi maisasaisantabi ng parlamento ang mapagpasyang katuayan ng CPN-M sa resolusyon ng kasalukuyang sitwasyon sa Nepal dahil kontrolado ng mga rebolusyonaryong pwersa ang 80% ng pambansang teritoryo.

Babala ng US, di pinansin ng Iran

HINDI pinansin ng gubernong Iran ang babala ng US na papatawan nito ng parusa ang bansa kung itutuloy pa rin nito ang programa sa pagpapaunlad ng teknolohiyang nukleyar. Ayon kay Mohammad Saidi, bise presidente ng Iran Atomic Energy Organization, ipagpapatuloy nila ang kanilang programa para makapaglikha ng elektrisidad mula sa enerhiyang nukleyar. Pinagpipilitan ng US na ang tunay na pakay ng Iran ay makalikha ng bomba atomika.

Ayon naman kay Pres. Mahmoud Ahmadinejah ng Iran, handa ang kanilang guberno at ang mamamayan ng Iran sa pampinansyang panggigipit o atake militar ng US.

May ilang buwan nang nagbabanta ang gubernong Bush ng gera laban sa Iran.

Ang Iran ay isa sa mga bansang binansagan noong 2002 ni Bush na "*axis of evil*" o "sentro ng kasamaan" dahil sa paggigiit nitong pambansang kasarinlan. Ibinilang din sa tinaguriang "*axis of evil*" ang North Korea at Cuba.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 9
Mayo 7, 2005
www.philippinerevolution.org

Editorial

Tusong sabwatang pulitikal ng Korte Suprema at Malakanyang

Habang may mga bahagyang mapakikinabangan pa rin ang demokratikong kilusan at mamamayan sa sunud-sunod na mga desisyon ng Korte Suprema tungkol sa patakaran *calibrated preemptive response* (CPR), Executive Order 464 (EO 464) at Presidential Proclamation 1017 (PP 1017), tusong mga pampulitikang layunin ang nasa likod ng mga ito. Pinagmumukha lamang itong makademokratiko, pero pinadudulas ng mga ito ang daan para sa pangmatagalang layunin ni Gloria Arroyo na kumapit sa poder at supilin ang mga paglaban sa kanyang paghahari.


Layunin ng dalawahang-mukhang mga desisyon na palusutin si Arroyo sa anumang pananagutan o kaso ng paglabag sa sariling konstitusyon.

Dahil sa napakarami at napakagarapal na mga kaso ng pang-aabuso na nagbunga ng matindi at malawak na pagbatikos sa mga pasistang pang-aabuso at sa mga paglapastangan sa mga karapatang sibil, hindi maitanggi ng Korte Suprema na tadtad ng mga paglabag sa konstitusyon ang mga patakaran at kautusang ginamit ng Malakanyang para pigilin ang paglalantad ng katotohanan at ang panunupil sa mga demokratikong pwersa, oposisyon at mamamayan. Naobligang bigyang pansin ng Korte Suprema ang mga ito at langkapan ng pakitang-taong pagbatikos ang naturang mga patakaran. Sa proseso, iniwasan na magmukhang tahasang maka-Arroyo at masira ang kredibilidad ng korte.

Nagbulag-bulagan ang Korte Suprema sa esensya

ng mga naturang patakaran at hakbangin ni Gloria Arroyo upang pilit na

palabasing ang mga iyon ay pawang nasasaklaw ng kanyang kapangyarihan. Itinaguyod ng pinakamataas na reaksyunaryong korte ang mga esensyal na nilalaman ng mga pasistang patakaran at batas na ginagamit ni Arroyo sa pagsikil sa katotohanan at panunupil sa mamamayan. Hindi binigyang-pansin ang ugat nitong pang-aabuso sa kapangyarihan ng presidente. Sa halip, ang pinuna lamang ay ang mga pang-aabuso ng mga nagpatupad at pinayuhan pa si Arroyo kung papaanong mas madulas na magagamit ang kapangyarihan ng estado sa pagsupil sa katotohanan at paglaban ng mamamayan.



***Mga tampok sa
isyung ito...***

**Matatagumpay na
opensiba ng BHB**
PAHINA 3

**Buuin ang mga Yunit
Pananggol sa Baryo**
PAHINA 4

Insulto sa Mayo Uno
PAHINA 10

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com